



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 7

Kiran George-i Indonesia Masters kokogo

Brazil G20 senden nung Putin maputsü: Lula



VOL. XX NO. 330 (ADOK 330)

DIMAPUR TENTONÜ (MONDAY)

RONGJUI (SEPTEMBER) 11, 2023

₹ 5.00

Assam nung tanur den kibong akümer tebur 3000 aputsü: CM Sarma

Silchar, September 10, 2023

(Agencies): Assam sorkari tanur kiyimba anema mapa tenzükshitsü aser taruba anogo 10 tsüingda tebur 3000 shi aputsü ta chief minister Himanta Biswa Sarma-i ashi.

“Ita trok tejakdang ni Assam nung tanur kiyimba atema nisung 5,000 apu. Ni G20 atemtsü ataa liasü aser taruba anogo 10 tsüingda nisung tebur 2,000 nungi 3,000 tashi tanur den kibong akümba atema aputsü, kechiyong asenoki tanur kiyimba agientsüla” ta CM Sarma-i ashi.

“Iba ya odang inyakdaksüra telok ka nungi jalatem kodanga tejakleni maotsü. Parnok dak maneni tashiyim inyaktsü” ta paisa ashi.

Guwahati nung Bharatiya Janata Party (BJP) Mahila Morcha indang national executive senden nung Assam CM Sarma-i iba osang metetdaksü.

“Taküm küm tatemlen tashi nung Assam nung tebur kati tetsür aika den kibong akümba anentsütsü sentong lir. Iba ya Muslim nunger anema inyakba mapa masü” ta Sarma-isa ashi.

“Onoki (triple) talaq, child marriage aser polygamy maparen anentsüba ya Muslim nunger atema inyaktsür. Congress sorkari shingai tesüba nung iba mapa meinyak” ta paisa shisem.

Taküm May ita retired Guwahati high court judge Rumi Phukan-i aniba luden kati shima Assam state assembly ajanga polygamy anema ozüing ka yanglutsü asadanga liasü.

September 3 nü iba luden ajanga sorkar dang bill ka benoktsü aser ibaji assembly nung agizükba sülen India Tir mesüra Governor dang nungi temelaba meshitsü junger ta shiogo.

“Islamic linük aika nung inyakyim tamajungtem anenogo saka asen linük nung parnok ama mapa inyakdang Congress lennirtem Rahul aser Sonia Gandhi nati minority anema inyaker ta aitsür” ta CM Sarma-

isa ashi.

“Item maparen ajak ya tetsürtem dak tashiyim inyakba anentsütsü aser talisa tanur tetsür arishi küm 9 nung kibong kümdaktsüba aser arishi küm 12 tashi nung tetsü kümdaktsüba anendaktsütsü atema lir” ta paisa shisem.

“Prime Minister Narendra Modi-i bendanga agütsüba aser tamendakdak tajung yangerba ajanga G20 Summit takok ngua mongogo. PM Modi-i linük longjemtsü merangba aser ‘Bharat’ tenüng amer linük maitsü akangshitsü merangba atema tenüngsang agütsür” ta CM Sarma-i metetdaksü.

“Linük Bharat kümogo. Küm 75 sülen linüki iba maitsü agizükogo. Asenok ajak Bharatiya ta Prime Minister-i angatetdaksüogo. Küm 500 shi tejakdang Mahapurush Srimanta Shankardeva-i linük dang Bharat aja” ta paisa ashi.

“Congress party-i parnok rally atema ‘Bharat Jodo Yatra’ (Unite India) amshi saka parnok dang INDIA ta aja. Rahul Gandhi-i o jembidang ‘Gandhi’ tenüng mamshitsüla” ta Sarma-i Congress luja olen ka jembi.

“Prime Minister Narendra Modi ya Vishwaguru (World Teacher) ka lir aser pa lenisüba kübok linük azükarur. India nunger ajaki Modi nem kümsük asemen tashi Prime Minister inyakdaksütsüla” ta Assam CM-isa ashi.

CM Sarma-isa BJP Mahila Morcha nung adentsü arurtem ajak pelaa agizükdang “Assam ya Maa Kamakhya lima lir. Ni nenok ajak dang Maa indang tekülem ki semdangtsü aser la temoatsü meshitsü shiogo. Imlar ajaki tekülem ki semdang alitsü. Maa Kamakhya nungi asenoki tashi anguba ya temoatsü ka lir aser la taochi ajanga iba lima azükarutsü” ta ashi.

“Nenok küm ana sülen Assam-i arudang Kamakhya Corridor ka angutsü” ta paisa ashi.

Municipalities aser town councils senden amentsü

Dimapur, September 10, 2023

(TYO): September 16, 2023 nü Nagaland nung municipalities 3 den town councils 36 külem senden ka amentsü metetdaksüogo.

Iba senden ya Whispering Winds, Mokochung nung anüingdang 12:00 ako nung amentsü jataper.

Senden nung All Kohima Municipal Ward Panchayat

(AKMWP), Dimapur Urban Council Chairmen Federation (DUCCF), All Ward Union Mokochung Town (AWUMT) aser Nagaland nung town councils 36 adentsü.

Ketdangpur ajaki züingsem asemsem anitsü metetdaksür aser 7085614768 mesüra 9862141515 nung tongteprateptsü metetdaksüogo.

G20 Summit: Alima lennirtemi PM Modi tenüng asanger



September 10, 2023 nü New Delhi nung Prime Minister Narendra Modi-i Brazil President Luiz Inacio Lula da Silva nem G20 presidency indang gavel amoktsüdag agiba noksa angur.

New Delhi, September 10, 2023

(Agencies): India-i G20 presidency inyakdang mapa tajung aika inyaktetba atema alima lennirtemi Prime Minister Narendra Modi nem tenüngsang agütsüogo.

PM Modi lenisüba ajanga lemtet tajung agiba aser Global South atema ola adokba atema alima lennirtemi pa tenüng asanger.

India parnok kanga junga anepaluba aser Prime Minister Modi-i summit takok ngua ketdangtsüba atema lennirtemi tenüngsang agütsü. Parnokisa India-i ayimoktsüba yimym ‘One Earth, One Family, One Future’ agizükogo.

“India lenisüba kübok asenoki nüngdakba mapang ka ama longjemtsütsü ta sayuogo. ‘Bharat Mandapam’ nung senzüdang aser idakji yua alibatem repringdang PM Modi-i digital initiative aser technology ajanga asen linüktem nung kinüktriba tesemtem nung alirtem yaritetsü indang angur” ta British Prime Minister Rishi Sunak-i ashi.

Japanese Prime Minister Fumio Kishida-ia Prime Minister Modi ajanga G20 kanga junga len aniba atema tenüngsang agütsü. Külen Russian Foreign Minister Sergey Lavrov-i Indian presidency ajanga tamendakdak yangerba nung ajemdaker G20 tali amaliteptsü ayongzük.

Turkey President Recep Tayyip Erdogan-ia Prime Minister Modi dang junga anepaluba atema pelaba ashi aser iba summit ya asen alima ka dang atema

temoatsü asütsü imlar ta metetdaksü.

Alima lennir aikati PM Modi ajanga Global South asoshi ola adokba atema tenüngsang agütsü. Iba ajanga G20 nung African Union (AU) züingsem akümtsü lemtet agia liasü.

“African Union ya teyariteper tongtipang ka lir. Nai (Modi) asenok külemi longjemdaksür, külemi lidaktsür aser asenok longjemer tayongzükbatem koktetsü tashi aliba nenshir” ta US President Joe Biden-ia ashi.

“Nai iba sabangi AU bener aitba shisatsü atema ni nü (Modi) nem tenüngsang agütsür” ta International Monetary Fund Managing Director Kristalina Georgieva-i ashi. Maneni, Bangladesh Prime Minister Sheikh Hasina-ia Prime Minister Modi dang la iba summit nung jaokba aser Global South ola adokba atema pelaba metetdaksü.

Union of Comoros President aser African Union Chairperson Azali Assoumani-ia India dang pelaba metetdaksü.

“G20 nung AU dendaktsütsü atema India-i shilem agiba atema tenüngsang agütsür” ta South Africa President Cyril Ramaphosa-i ashi. Netherlands Prime Minister Mark Rutte-ia G20 nung Global South tongti süa benokba atema Indian presidency dang pelaba metetdaksü.

“Prime Minister Modi aser India nunger dang iba sentong takok ngua ayongba atema pelar. Ni tanü Mahatma Gandhi nem tetushi agütsü aodang temlung nung kongshi. Kü yimtenren

taküm nung Gandhi ajanga ajungmesor. Ni non-violence tangatetba sülen anidakker” ta Brazil President Luiz Inacio Lula da Silva-ia metetdaksü.

“Asenoki inyaktetba atema nübortem asenok bilemtetsü. Prime Minister Modi nai asenok ‘One Future’ atema yangi adenshidaktsüba ya kanga tongtipang” ta Canada Prime Minister Justin Trudeau-ia ashi.

Mauritius Prime Minister Pravind Kumar Jugnauth-ia India lenisüba nem tenüngsang agütsü. “G20 kanga takok ngua mongogo aser Prime Minister Modi-i iba maongka agütsüba atema pelar” ta Jugnauth-ia ashi.

Maneni Spain, Mexico aser Oman lennirtemia Prime Minister Modi nem tenüngsang agütsü aser India-i G20 takok ngua ayongba aser ainertem kanga junga anepaluba atema pelaba metetdaksü.

Deobarnü US. President Joe Biden, Germany Chancellor Olaf Scholz, British Prime Minister Rishi Sunak, France President Emmanuel Macron aser Japan Prime Minister Fumio Kishida nungeri Mahatma Gandhi nüngshilung semdanga tetushi agüja liasü.

New Delhi nung G20 Summit Deobarnü tembang aser iba mapang India-i Brazil ket nung bloc presidency agütsüogo.

G20 Summit shibangba sentong nung Prime Minister Narendra Modi-i Brazil President Luiz Inacio Lula da Silva ket nung G20 presidency indang gavel amoktsü.

Manipur state cabinet-i ‘armed forces’ merenshitsü lemtet

Imphal, September 10, 2023

(Agencies): Manipur cabinet-i armed forces dang civilian dak tashiyim mapa meinyaktsü metetdaksüogo.

State aser central forces ajanga civilian dak tashiyim mapa inyakba ya shitaka ta putetra temerenshi alitsü ta Manipur cabinet-i telemetba agi.

Manipur chief minister N Biren Singh menden ser cabinet

senden nung iba lemtet agi.

September 8 nü Tengenoupal district kübok Pallel nung sepaitem den raradang civilian ana asüba aser nisung 50 tema yiruba onük cabinet senden nung benoka lemsatet.

“Central armed forces-i lungkak aiterem dak tim masüba inyakba state cabinet-i aitsür” ta Manipur minister S Ranjan-i ashi. Manipur sorkari Centre dang

Pallel lendong indang osang lemsateptsü ta paisa ashi.

Pallel nung lungkak aitba mapang Meira Paibi teimba ser lungkak aiterem security forces pei taseptem nungi madokdaksütsü atema lenmangtem nokdang.

Idangji security forces-i lungkak aiterem senshidaktsütsü atema tenük amdaktsüba mokozi amshia liasü.

State nung tanurtem mapang shidak nung vaccine agidaktsütsü ayongzüker



Dimapur, Rongjui/Sept. 10 (TYO): Linük ajunga den külemi Nagaland nunga Intensified Mission Indradhanush (IMI 5.0) mezüingbuba round August 7-12, 2023 anogotem agia liasü.

IMI 5.0 nükjiding ya tila tanur küm pongu tashi doses magi alirtem U-WIN nung register asütsü aser IMI sessions balaka yanglua alidak vaccine agütsütsü asoshi lir. IMI 5.0 indang Round 2 ya September 11-16, 2023 anogotem agitsü aser Round 3 ya October 9-14, 2023 anogotem agitsü lir, ta Dr. Imkongtemsu Longchar, State Immunization Officer, Directorate of Health & Family Welfare ajanga sangdong ka nung ashi.

IMI 5.0 indang Round 1 mapang state nung arishi küm 0-2 tsüingta shilem 81 awajema liasü, arishi küm 2-5 tsüingta shilem 92 aser jangjateta aliba mashisa tetsür shilem 86 (State coverage data nung aliba ama) awajema liasü.

IMI Round 2 (September 11-16, 2023) atema State nung IMI sessions 191 yanglua lir aser iba mapang tanur arishi küm 0-5 tsüingta 1187 aser mashisa tetsür 81 nem vaccine agütsütsü nükjiding lir.

Item teyari agirtem ya vaccine magi mesüra tesadang agir aliba tanur aser mashisa tetsü tem ashoshi lir, shirnoki mapang shidak nung immunization magitet. Tekolak azüingba mapang teyari agitsüpur kar mezüingsemra, vaccine agütsüba tesem nung tenüing zülüoktsü maongka lir aser iba atema ID card ka

(Aadhaar card, PAN card, passport, driving license, service card, ration card mesüra sorkari agizüka aliba ID card masi ka) nüngdaksü, ta sangdong ajanga ashi.

Healthcare nung inyaker tem tsüingtong kidangi oaka vaccine agitsü memolungba tebilemstü tang tashi lir aser tanur ajak nem takum kumzüksüba vaccine agütsütsü merangba nung ibaji tetsükdaksü tulu lir, ta ashi.

IMI 5.0 indang Round 2 nung item anepalur temi pei tanurtem TB, Pneumonia, Diarrhoea, Polio, Diphtheria, Pertussis (Whooping cough), Tetanus, Hib, Hepatitis-B, Japanese Encephalitis, Measles & Rubella amala vaccine preventable diseases (VPDs) nungi kumzüka ayutsü asoshi maongka agitsü Department teimla lir, ta sangdong ajanga ashi.

Tsürabor temi vaccine agitsü anogo lateta aliba mapang tanur nem vaccine ka dak tali agütsütsü akok ta meteta alitsüla. Item ya ajem mesüra oral dose vaccine asütsü.

Arishi küm balala nung vaccine doses balala agütsür, anungji mapang shidak nung mozü magütsüba tanur ka nem vaccine ajem ya mapang shidak nung immunization agirtem dang timba asütsü akok. Tanur nem ajem ka dak tali agütsüba nung timtem mali ta meteta alitsüla, ta ashi.

Mapang shidak nung vaccine magütsü aliba tanur ka ano asendenshir tenzüksü menüingdak. Anungji magi aliba vaccine tem tekeraba nung agia VPDs nungi kumzüka ayutsüla. TB asoshi agütsüba vaccine

dang BCG (bacille Calmette-Guérin) vaccine ta ajar, koba tanur mezüing hopta trok tsüingta agütsür aser iba vaccine agiba ajanga temang angotsü akok saka mapang talangka melie anentsü, ta shi.

Iba sülen vaccine agiba ajanga kasa timtem ajurutsü ta tsürabor temi tai angateta pei tanurtem immunization anendaktsür. Saka ajem agidak tera ayangba mesüra angoba ya item vaccine agi nokdangtetba tashidak den medemdangtsü makok ta tsürabor temi angatetsüla, ta Dr. Imkongtemsu Longchar, State immunization Officer ajanga ashi.

Tanur kar temang tera metatsü akok mesüra ajem agiba tesem nung merema akumtsü akok, saka aji yimya dang. Itemji pa-sasa süshia aotsü. Temang arongba manenra, tsürabor temi healthcare nung inyakertem den asüingdangteptsüla, ta ashi.

Tanurtem tashidak balala nungi kumzüka alitsü asoshi arishi küm shidak nung tanurtem nem item mozü agütsütsü tim ta nüburtemi angatetsüla. Item vaccine ya Government health facilities ajak nung angati angur aser vaccine magi mesüra kar agir aliba tanurtem takum agitsüsa tashidak agi meneptsü tezüpa asütsü.

Nüburtem teyaritem nung dang iba maparen inyaktetsü, anungji sendaktepa aliba department, Faith Based Organizations (FBOs) Civil Society Organizations (CSOs), Village Council Chairperson, tetsür lenirtem aser IMA, IAP, IDA, Rotary, Lions Club züingsemtemi yaritepa arishi küm pongu tekübok aliba tanur ajunga ner aliba tesem nung special immunization session alidang vaccine agidaktsütsü ayongzüker aser mapang shidak nung Government health units tem nung oa Routine Immunization services agitsü ayongzüker, ta sangdong ajangasa ayongzüka liasü.

Advisor TNMannen-i obendangertem ajuru



Advisor, Law & Justice and Land Revenue, TN Mannen IAS (Retd.) aser Justice L.S Jamir, Judge(Admin), Gauhati High Court na Gauhati High Court, Kohima Bench indang office nung tangokba noksa nung angur.

Dimapur, Rongjui/Sept. 10 (TYO): Advisor, Law & Justice and Land Revenue, TN Mannen IAS (Retd) aser Justice L.S Jamir, Judge(Admin), Gauhati High Court na September 8, 2023 nü ajurutepa liasü.

Iba sülen Advisor-i Justice K.Sema aser Justice K.Ete, Judges, na den Gauhati High Court, Kohima Bench indang office nung sensaksema liasü.

Parnoki state nung legal awareness temaba jenjangi ajungkettsüba dak sendakba ken o jembia aser ano state nung tang teinyakdak maparen balala indang jembia liasü.

Iba mapang Additional Chief Justice ajanga Chümoukedima district asoshi District Judicial Court ka nüngdakba lemsatapa liasü aser ano state nung judiciary dak sendakba ken o balala jembia liasü.



Nagaland nung District headquarters 11 nung 2023 küm asoshi 3rd Quarterly National Lok Adalat sentong Honibarnü agia liasü. Iba anogo District Legal Services Authorities temi sen crore aika jenjang sentsü-ludem ken o balala jembia obendang agüja liasü. Phek District Legal Services Authority ajanga district court complex nung Lok Adalat sentong agidang tangokba noksa nung angur.

Taoba ANSAM tir merenshiba aitsür: NSF

Dimapur, Rongjui/Sept. 10 (TYO): 26 Assam Rifles temi September 7, 2023 nü Manipur nung Kakching district kübok Bijoypur nung taoba All Naga Students' Association, Manipur (ANSAM) tir Wanglar Thirthing merenshiba khukhua aitsür, ta Naga Students' Federation (NSF) sangdong ka ajanga ashi.

Iba timtem ya nikongdang 7:30 ako meta Thirthing ya Imphal nung mapa ka inyaker kidangi shilangba mapang ataloka liasü.

Pa ya mezüing Manipur Police commando temi anendaktsü aser pa mena aliba gari meita reprangba sülen yok. Ajsüaka metre ishika orr pa ano Assam Rifles sepaitemi anendaktsü, aser kuli kecha magütsüi merenshiba liasü, ta NSF tir Medovi Rhi aser tongti zülur Chumben Khuvung nati sangdong nung ashi.

Ibai taoba ANSAM tir takum samatsütsü nükjiding nung inyakba ama angateter aser check post nung Assam

Rifles tem nükjiding balala asoshi khuret abener, ta NSF sangdong ajanga ashi.

Assam Rifles temi nüburtem kumzüka ayutsü asoshi bendanga agütsür inyaksangshiba nung temolung malemer, talisa tenem aliba tesemtem nung, kechiaser parnoki parnok ya "Friends of the Hill People" ta ashir.

Iba tatalokba ya balaka masü saka Manipur nung tensa mejungi alidak tao maket Naga nungur dak tenük yokba miim tasa ka südi ta amanger, ta NSF ajanga ashi.

Iba ama asaa tim masüba mapa inyakba yagi temolung animesüingzükteter aser ketdangtsür nungi tekeraba nung temolung agütsütsü nüngdaker.

Naga Students' Federation ajanga tim ketdangtsür dang iba tatalokba indanga kanga junga bushisingdanga aibeneler nem tapet temerenshi agütsütsü akhanger aser nübur ajunga kumzüka ayutsü mera agia inyaktsü ayongzüker, ta NSF sangdong ajangasa ashi.

Assam Rifles temi Solar Lights lema agütsü



Dimapur, Rongjui/Sept. 10 (TYO): Assam Rifles temi Sunbird Trust aser Schneider Electric den lungjemer "Illuminate lives for a Brighter Future" Campaign nung shilem

ka ama Mon district kübok Phomching nung Deobarnü solar light toku lema agüja liasü.

Assam Rifles aser Sunbird Trust ajanga iba ama mapa

tajung inyaka tesangwa bener arutsüba atema yimtsüing nung alirtemi pelaba lemsatapa liasü.

Iba mera yagi hostel nung alir tetsür 100 dak tema ajangzüksü.

G20 senden tembanga Modi-i Brazil Tir nem G20 Tir menden agütsü



September 10, 2023 nü New Delhi nung G20 senden tatembangbuba anogo nung Ato kilonser Narendra Modi, US Tir Joe Biden, Brazil Tir Luiz Inacio Lula da Silva, France Tir Emmanuel Macron aser Indonesia Tir Joko Widodo nungeri Rajghat semdanga Mahatma Gandhi nem akhüm agütsü dang tangokba noksa nung angur.

New Delhi, Rongjui/September 10 (Agencies): New Delhi nung anogu ananü G20 senden Amongnü tembanga Ato kilonser, Narendra Modi-i Brazil Tir, Luiz Inacio Lula da Silva nem G20 Tir menden agütsüba temaitsü hatori agütsü.

Brazil Tir, Luiz Inacio Lula da Silva nem G20 Tir menden agütsü dang Ato kilonser Modi-i, Brazil leniba nung mangdang yur nendaka inyaksü aser ibaji ajanga alima nung telongjem aser azükaru alitsü India-i amanger, ta ashi.

G20 tatembangbuba anogo nung linük balala nungi lenirtemi Rajghat semdanga Mahatma Gandhi nem akhüm agütsü aser Modi-i lenir aika den jurila senden amen.

Tatembangbuba senden nung Modi-i 'One Future' onük jembidang UN Security Council ulushitsü metetdakja liasü.

UN tenzükba mapang nung

züngsem 51 liasü saka tangbo 200 shi kümogo, ajisüaka UNSC nung züngsem tang tashi kasa dang lir, ta pai ashi.

Modi-i, "Iba mapang nung jagi tenzükba lenla aika nung alima kanga melenshiogo. Transport süaka, communication aser health & education süaka lenla ajak melenshiogo," ta ashi.

Tang UNSC nung permanent züngsem ponguji - US, China, France, Britain aser Russia lir.

Ato kilonser Modi-isa, "November ita tatembanglen-a video conferencing ajanga ano G20 senden ka amentsü ni mepishir. Iba senden nungji asenoki tang senden nung lemtetba onüktem reprangshitsü akok. Iba senden nungji nenok ajaki adentsü ni imlar," ta metetdaksü.

Modi-isa France Tir Emmanuel Macron, German Chancellor Olaf Scholz aser Comoros, Turkey, UAE, South Korea, EU/EC, Brazil, Nigeria

nungi lenirtem den jurila senden mena liasü.

Modi-i France Tir, Emmanuel Macron den senden amenba sülen India aser France nati külem sangdong ka ajanga, Defence Industrial Roadmap maparen tekaraba nung renema mapa kuma inyaksü lenir anati bangjemogo, ta metetdaksü.

G20 senden tembangtsü anasa India nunger Sherpa, Amitabh Kant-i, Honibarnü agizükba New Delhi Declaration atema telemetba agitsü asoshi India nunger ketdangsertem team kati ghonda 200 dak tema lenirtem den jembia liasü, ta metetdaksü.

Paisa ketdangsertem team jagi senden 300 shi amen aser draft 15 shi linük balala nungi lenirtem nem agütsü, aser ibaji ajanga Ukraine rara dak sendakba nung G20 senden mezüngbuba anogo nungsa telemetba ka dangi aru, ta metetdaksü.

Taoba mapang AP Chief Minister Naidu judicial ket nung agütsüogo

Hyderabad, September 10 (Agencies): Ochimashi ken o ka nung Amongnü Anti-Corruption Bureau (ACB) court-i taoba mapang Andhra Pradesh Chief Minister, Chandrababu Naidu anogo 14 atema judicial ket nung agütsüogo.

Andhra Pradesh skill development nung senotsü crore 371 dak sendakba ochimashi ken o ka nung Honibarnü Criminal Investigation Department (CID)-i pa pua liasü.

Iba ken o ya 2014 küm tentetba Andhra Pradesh State Skill Development Corporation (APSSDC) den sendaktepa lir. Bushisüngdangertemi ashiba agi, iba ochimashi nung tongti asalentong yanglurji Telugu Desam Party (TDP) tongti lenir, Chandrababu Naidu lir.

Chandrababu Naidu ya 2014

nungi 2019 küm tashi Andhra Pradesh chief minister liasü. Pa chief minister inyakba mapang nung APSSDC project atema Andhra Pradesh sorkari Germany nunger engineering company Siemens den tezüngzüktep yanglua liasü. Iba project kübok excellence centre trok amenoktsü atema Siemens nem mapa nunglokja liasü. Iba project atema Seimens-i senotsü kecha meindok saka state sorkari sen crore 371 lenzüktsü.

IPC kübok Arrla 120B (ozüing alema inyaksü asalentong yangluba), Arrla 420 (ashioktsüba aser ochimeshii kiojen agütsüba) aser Arrla 465 (ashikülakba) densema Arrla balala nung ajemdaker Naidu anema ken o benok.

Andhra Pradesh CID-isa pa anema Prevention of Corruption Act kübok ken o benok.



September 10, 2023 nü Tonk district nung lokti senden ka nung Rajasthan Chief Minister, Ashok Gehlot-i AICC General Secretary, Priyanka Gandhi Vadra agizükba noksa nung angur.

UN Security Council nung India züngsem tsüla: Turkey Tir Erdogan

New Delhi, September 10 (Agencies): Amongnü Turkey Tir, Recep Tayyip Erdogan-i United Nations Security Council (UNSC) nung India nem Permanent menden agütsütsüla, ta ashi.

G20 senden tatembangbuba anogo nung osangbenertem den jembidang Erdogan-i, "India ama linük ka UN Security Council nung züngokra onok (Turkey) nüma atangtsü. Alima ya pongu (UNSC züngsem linüktem) dang

nungi tuluba," ta ashi.

Tang UNSC nung permanent züngsem linük ponguji - China, France, Russia, United Kingdom aser United States lir.

Erdogan-i, "Kodang asenoki, alima ya pongu dang tuluba ta shira, iba tetezü iba ya United States, United Kingdom, France, China aser Russia dang masü ta shinüba lir. Onokibo linük 195 ji melentepa züngsem asütsü benoker," ta

metetdaksü.

Erdogan-isa Turkey aser India linük na tsüngda rongsenketzüng aser shishilembaba tsütsü tesendaktep tashi ita aliba metetdaksü.

South Asia nung Turkey atema shishilembaba partners tajungtiba rongnung India densema lir aser maneni linük ana tsüngda rongsenketzüng nung dang masü saka tanga lenla aika nung amalitepa inyaksü imlar, ta pai ashi.



September 10, 2023 nü Vijayawada nung Telugu Desam Party (TDP) tongti lenir aser taoba mapang Andhra Pradesh Chief Minister, N Chandrababu Naidu court ka matsüngdangi anir aotsü lia temang tendangba noksa nung angur. Skill Development Corporation nung senotsü ochimashi ken o ka nung Honibarnü police-i pa pua liasü.

Kaketshirtem soseta asüba shilem 70 agi teimba kümogo: NCRB

New Delhi, September 10 (Agencies): 2011 küm aser 2021 küm tsüngda India nung kaketshirtem soseta asüba shilem 70 agi teimba kümogo, ta National Crime Records Bureau (NCRB) data ajanga metetdaksü.

Amongnü (September 10) alima tesem ajaklen World Suicide Prevention Day amongba anogoming nung NCRB-i India nung kaketshirtem soseta asüba kanga bulua akümba osang ya metetdaksür.

India nung, talisa Rajasthan kübok Kota nung kaketshirtem aika soseta süogo.

India nung coaching centre tiyongtsü, ta züngshjiba Kota nung 2015 küm nungi tenzükba küm shia kaketshirtem teimba soseta asüba taküm liasü. Tesüiba ita ana nung IIT Delhi nunga Dalit nunger kaketshir ana soseta süogo.

NCRB-i, 2011 küm India nung kaketshir 7,696 soseta asü aser 2021 küm nungbo India nung kaketshir 13,089 soseta asü, aser ibaji shilem aikati teimba akümba lir, ta metetdaksü.

NCRB indang Accidental Deaths and Suicides in India (ADSI) reports ajanga kaketshirtem soseta asüba kuli

balala tejangja shia mali, ajisüaka zünga balala asüba metetdakja lir.

2021 küm soseta asürtem shilem 30 bo kibong nung timtem balala ajanga asüba liasü, shilem 14 nüknürartem soseta asüba liasü, shilem 13 shirangba agi soseta asüba aser shilem 8 tatidang nung tamakok anguba agi soseta asüba liasü. Shirangba agi soseta asürtemji shilem 58 bo tekolok nung timtem aliba agi liasü.

2021 küm tatidang nung tamakok anguba agi soseta asür 1,673 liasü aser parnok rongnung tebur 991 aser tetsür 682 liasü.

News18 ajanga bushitetba agi, soseta asürtem tetsür dang nungibo teburtem teimba kümogo, ajisüaka arrshi küm 18 tekübokpur soseta asürtembo tetsürtem teimba lir.

Küm shia India nung nisung 130,000 shi soseta asür. 2000 küm nungi 2021 küm tashi nung India nung nisung million 2.816 soseta süogo aser ibaji küm shia lemtsüra küm shia nisung 130,000 jungnüa soseta asüba lir.

National Crime Records Bureau (NCRB)-isa, 2017 küm nungi tenzükba India nung soseta asürtem teimba-teimba dang akümer, ta metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, RONGJUI (SEPTEMBER) 11, 2023

G20 kintem tebilemtsü

Taküm 2023 küm India asoshi mapang tajung kaji G20 telongjem nung India tir menden ataba ya asütsü. Iba maongkaji agia Nagaland tashi nunga G20 linüktem nungi yimsüsür aser rongsen amshirtem arua sentong tajung agiba asenoki nguogo. G20 tetezü 'the Group of 20'. Tetezü, alima kin 20 telongjem. Iba telongjem nung adener alima kintemji Argentina, Australia, Brazil, Canada, China, France, Germany, India, Indonesia, Italy, Japan, South Korea, Mexico, Russia, Saudi Arabia, South Africa, Turkey, UK, US aser European Union lir. Item denji ano taküm küm nungibo African Union-a tendaktsüogo. 1999 küm G20 kintem telongjem ya item alima kintem rongnung rongsenren adokdaksüba, amshiba aser shishilembaba maparen nung kin ajak tajanzük angutsüsa yaritepa aotsü nükjidong yur tenzük. Atangji, G20 nung adenba kintemji reprangdangra alima nung takar aser tashitemeter kintem ajak dena lir. Item G20 kintem ket nung alima rangben nung amshiba rongsen noklang nung shilem 75 lir aser alima nütsüng yongsüka asemsü nung anasübo G20 kintem asütsü. Inyakdi asünungbo G20 telongjem ya UN danga tashi taitba aser shitakba longjemtet nungbo alima nung kin o kin na tsüngda rara madoki teti yimjung nung alitsü. Atangji, temelung ajak agi melongjemtetaka, G20 telongjem tentetba ajanga alima nung yimjung nungdakba indang jembir, anungji G20 nung aliba kintemibo alima kin ka anema rara ayongzüksüba atsüayonga bilemtsüla. Iba jagi meteta aser memeteti alima nung kin o kin na tsüngda rara adoktsüba lendong mapatem aika nokdangtsü aser nokdang alitsü südi. Ajisüaka, ano külen reprangdangra, tang G20 kintem rongnungi Russia-i Ukraine amakba maparen nung G20 kintem longjemer nokdangtsü melen, kari Russia asemer aser kari Ukraine asemer aser ano India ama kin tulu aser tongtibang ka külena masü, külena masü ta tetsüngda nung alima yimjung asoshi nungsen magitet kazür ta asüba G20 kintem temulungjang aser tangatetba yagibo G20 tenzükba nükjidong matonger. Russia o Ukraine na yabo 1991 tashibo USSR kübok külemi liasüba kasa adianu kin ana lir, anungji akhi USSR aser tang Russia tembar India ama katibo US aser China ama G20 kintem rongnunga tashi taitba kin ana ayonger G20 tenüng nung Russia aser Ukraine na prongla ajurua yimjung mapa inyaktsü nungdak reprangteter. Atangji, takartem tashi tokteper asünungji, alima tia majung US aser Russia na meputep, China o India na meputep, ano US o China na ta meputep ta kasa lokti telongjem nung alirtem meputepba ajanga alima nung yimjung nung rongsen renlokdaaktsü melen, rara adoka alima akoksadaksür. Iba timtemji tang India lenisüba kübok G20 Delhi senden ajanga koktettsüsa inyaktsü imlar. Tangbo, joko shitakba nungbo African Union adenba ajanga G21 asütsü. Iba jagi alima nung maparen aika nung UN-i kechi ashir ta masü saka G21 telongjemi kechi ashir ta asüba jagi dang agitsüsa akümtsü. China tir Xi Jinping arua G20 Delhi senden nung medentetaka, pa melen China Communist Party nung pa den atongba, Li Qiang arua shilem agia jembidang, G20 ama tashi akaba telok nung telemsa melen telongjem, rarateptsü melen teyaritep aser pei atema dang bilemtsü melen ajak atema bilemba shisatsü aser tangatetba nungdaker ta ashiba o nung G20 kintem asoshi tebilemdangtsü lir aser G20 nükjidong meyipa reprangshia inyaktsü ajungshir. Akhidangbo alima rara adokba nükjidongji tangar kin meyong ali atsünga agitsü asoshi raraba tongpang liasü saka tanü putu nungbo alima kintem meputepba aser raraba ya ali rakteper masü saka rongsen rakteper, anungji ali telong aser tema, oda anüng nung aliba rongsentem dena bendena tazü agi tamen aser tagitsü küma yanglur ayoktsü merangteper. Iba jagi G20 kintem telongjem ya alima ajunga takar kumdaktsü aser shishilembaba mapa nung kati ka yariteptsü nükjidong liaka, tatishitsü agi, G20 kintem rongnung alima nung nungdakba osettem teimba aser tajungba yanglutetba kin, Chinai yangluba osettem India-i bener marudaktsüra aser US-i malira, G20 nükjidong kodaser ataloktsü? Ibaji angatetsüsa tang G20 Delhi senden nung Li Qiang-i shioktsüogo.

OLEMSABANG

Nabong taremtsü mapang nung raratepa tongteper

- L. Kika pongener

Asen Aor-i shin o ka, "Nabong taremtsü mapang nung raratepa tongteper"...ta jembir. Otsüla oboula nungeri shin o jembiba ya odangbo jembiba masü, saka kanga dang takzü-takponga lia arur, taküm nung ataloka ajangshiba agi shin o ya jembia aru, aser parnok takzü-takponga jembiba amaji shitakba asangsang nung ataloka aru. Aji oda, Nabong kodang parnok o parnok na tsüngda kanga meputepi tongtepa raratepdir, iba sulenji wara tesashi ka arua remoka asüba otsü jembir. Otsüla oboula nungeri iba shin o jembiba ya, Nabong dakji ajidaker...asen nisunger libaliro atema tongtipang sua jembiba shin o ka lir. Asenok nisunger libaliro nunga kodang pei kin o kin, pei yimer o yimer, pei kidong o kidong, kinunger o kinunger aser adianu o adianu tsüngda meputepi raratepdir, idangji nutsüng marentsüsa timtem kar arur, mesura tangar memenepi tesuleni oa-adoker aser telungi alur...ta takzü-takponga jembia aru. Aji oda, otsüla oboula nungeri jembia aruba amaji, tang asen Aor tia ya khen jungjunga asadanga reprangdangra, asen o asen na tsüngda nung kanga meputepba aser tsükchitepba agi sunga kümogo. Loktiliba ajunga nung tanishir menden raktepa meputepertemji Aotsür Aor teimba asütsü. Ibajagi, asen Ao kin tanübo lenla ajunga nung tangar memenepi küma aor sudi ta shisadanger. Nagaland State ngur mezüngbuba asen Ao kin nungi Chief Minister sur sorkar anir aruba, tanübo tangar sulen tanidaker kümogo. Tang Nagaland sorkar nung Chief Minister kati anir, Deputy Chief Minister ana, aser Cabinet Minister tuko lir, item rongnungji jungjunga reprangdangra...Asen Aor tazünglen masü tom-sanger/talak-len dang kar dena lir. Aji oda, Chief Minister-jisa masüyongjia, Deputy Chief Minister ana rongnungji, kabo asen Aor sunutsüka sernung...ta sasa-a bilemer, saka tanü asen Aor iba jenjangji kümogo. Asenoki asen sasa kanga numadanga 'Samanir' kin ta jembiyongjia, iba jenjang jagi sepzüka aluogo. Anungji asen Ao kin asen jenjang khen meyipa reprangshitsüba mapang ka tongogo.

Asenoki tangar kin-i asen dak tujukmerema asenok lenla ajunga nung atsüngdoker ama, tangar kin nem nungsen magutsüli, saka asen sasa asen tashimait khen arokaroka shisadanga bushidangdi. Asenoki kanga junga shisadangra, tangar kinbo, pei kin sasep nungbo tzü-a meseni zepzep ta dang longjema lir-ko...Angami aser Chakesang nunger, pei kin sasep nung tambu/tamapur...ta raktepba otsü kecha mali, Tenyimia kintem zepzep ta dang tzü-a meseni longjema lir. Sema nunger balaka Naga lima tanga District nunga yim aika küma oa lir, Mokokchung District nunga yim karbo küma lir, saka par kin sasep nung tambu/tamapur...ta raktepba otsü kecha mali zepzep ta dang longjema lir. Eastern Nagakintem tzü-a meseni zepzep ta dang longjema aliba asenoki tanü mapa agi ngudagi. Ajisüaka, asen Ao kinbo kidong o kidong tsüngda nunga putepa mali, yimer o yimer na tsüngda nunga putepa mali, asen Aor-bo kin/kidong tsüngda nunga...Onok tambu, parnok tanübo, onok tamapur, parnok tesupur, ozü tuluba, par tilaba ta...Kin ka adianu ka dang sernung, kidong sungsang balala jakzüka/razüka aoba-a otsü/olem balala zülutepa yur, kati ka anema tsükchitep manener. Tanga ajakji oda toktsür, tamang yimsu osangtajung agizükba nunga kenbang-obang mapur. Aji oda, asen Ao kin tia jungjunga shisadangra, tangar kintem dang taaktsüka lir. Ao kin dak nungi 'OCHI' talangkati pila-a oadokogo. Aotsür Aor lennir nungi shir tanidaker tashi dak nungi ochi talangkati pila-a oadokogo. Ao lima yimtsüngtem nung ochiba yimdong nung temesor mali laoa lir. Asen Ao kin memelenshira Tsüngremi atakatamba kin ka küma-adoktsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Koinonia Prayer Centre nung revival sentong takok ngua agiogo



September 10, 2023 aonung Koinonia Prayer Centre (KPC), Kohima nung revival sentong nung Pastor Samuel Sengupta aser pa kinungtsü Atmik Jeeva nati Tsüngrem O jembia taküm kuli lemsatepdang tangokba noksa nung angur.

Kohima, September 10 (TYO): Koinonia Prayer Centre (KPC) Kohima nung ita shia agiba revival sentong September 8-10, 2023 anogotem nung 'Ajisüaka Pai ashi, Tsüngrem O anga temelung nung züngoka yur inyakertem temoatsüba' omen nung ajemdaker agiogo, ta Koinonia Media Ministry-i sangdong ka nung metetdaksü. Anogo asemnü revival nung tongti o jembirtemji Rev. Zotuo Kiewhuo, Senior Pastor, Koinonia Baptist Church (KBC)

asert Samuel Sengupta, Pastor, Atmik Jeevan Church Bagdogra na liasü. KPC Worship Team aser KBC Women Department Worship Team nati tekülem aser tetushi ania liasü. Amongnü nikongdang tongti o jembirji Rev. Zotuo Kiewhuo liasü. Omen nung ajemdaker jembidang Rev. Zotuo Kiewhuo-i, "Asenoki Tsüngrem O angar beshira taküm nung tesasaba kecha malitsü," ta ashi. Kasa sentong nung

Koinonia Fellowship Itanagar-iken kar tena liasü.

Revival tatembangbuba sentong nung tawa NPSC kübok Nagaland Civil Service Examination nung takok angurtem- Neithozo Theünuo (EAC Rank 1), Zavito Ltu (EAC Rank 8), Pelhoueinuo Kiewhuo (Asst. Professor, CESE NPSC) aser Tsupithong Yimchunger (Governor's Commendation Certificate awardee 2023) nungeri taküm kuli lemsatepa liasü. Parnok ajaki takok anguba atema Tsüngrem nem tenüngsang agütsü aser Arogoi sarasademsüba atema pelaba lemsatep.

Pastor Samuel Sengupta aser Chanda Sengupta natia Tsüngrem O jembia aser Leukemia tashidak nungi taneptsü angur Ranjay Basumatary-i pa taneptsü anguba kuli lemsatepa liasü.

Honibarnü Khristan yimsü dangi meyiper nisung ana densema nisung asem baptia liasü.

Koinonia Prayer centre-i ita shia tanabuba hopta nung Revival sentong ayongzüka agir, aser tang agiba revival ya Thejaneinuo Solo-i ayongzüka liasü.

Supreme Court-i UP nung Khristan lenir kar nem tekümzüka agütsü

September 10, 2023: Uttar Pradesh kübok Fatehpur district nung Broadwell Christian Hospital Society chairman, World Vision International Fatehpur office nung inyakertem aser Prayagraj nung aliba Evangelical Church of India nung putir nung police-i aputsü liasü, ajisüaka Supreme Court-i parnok nem tekümzüka agütsüogo.

Fatehpur District nung aliba Broadwell Christian Hospital Society chairman, Mathew Samuel-i tangartem Khristan yimsü dangi kangshia meyipdaksür, ta pa nem tai tonglokja lir.

Chief Justice DY Chandrachud aser Justice, JB Pardiwala nati akümba benchisa Uttar Pradesh sorkar nem Mathew Samuel aser tangartem mepishiba osang metetdaksü.

Khristantemi tamalen Allahabad High Court-i agütsüba obendang anema Supreme Court nem temepishiba agütsü. High Court-i tamalen state police-i Khristantem anema benoka aliba First Information Report (FIR) agientsü memelungi liasü.

Tan ita tetenzüklen Supreme Court bench-i, "Special Leave Petition atema notice agüjang aser iba mapang nungji Police Station Kotwali, District Fatehpur, UP nung benoka aliba FIR Nos 224/2022, 54/2023, 55/2023 aser 60/2023 dak sendakba nung temepishiba ken

agüja alirtem anema kecha meinyaktsüla," ta tetuyuba agütsü.

Khristantem atema ken o jembitsür senior advocate, CU Singh-i Supreme Court dang Khristantem anema bushisüngdangba maparen anena lidaktsütsüla, ta mepishia liasü.

Tamalen Allahabad High Court-i Samuel aser tangartem anema benoka aliba ken otemji agientsü memelungi liasü.

Uttar Pradesh Police-i Indian Penal Code, 1860 den Uttar Pradesh Prohibition of Unlawful Conversion of Religion Act, 2021 nung ajemdaker Samuel Mathew aser tangartem anema ken o benoka liasü.

Taküm January ita nung Police-i Broadwell Christian Hospital aser World Vision International's Fatehpur office den sendaktepa alirtem aser Prayagraj nung aliba Evangelical Church of India nung putir anema notice agüja liasü. Ozüng alema tamangba yimsü meyipdaksüba nung melung melemi parnok nem notice agütsü.

Yaküm December ita nunga missionary hospital Broadwell Christian Hospital anema notice agüja liasü. Iba hospital ya British nungeri yimsüsüba mapang 1909 küm lapokba hospital lir. Notice nungji Khristantem dang bushisüngdangba nung amaliteptsü metetdakja liasü.

Police-isa Sam

Higginbottom University of Agriculture, Technology & Sciences (SHUATS) aser Allahabad Bible Seminary densema Khristan rejutem anema-a notice agüja liasü,

2022 küm nungi tenzüka Fatehpur nung aliba police station asem nung Khristan rejutem anema ken o aika benoka lir. Vishva Hindu Parishad (VHP) aser Bajrang Dal teloktemi Khristan telok balalai Hindu nungertem Khristan yimsü dangi meyipdaksütsü meranger, ta tai tongloktsüba nung ajemdaker police-i Khristan rejutem anema ken o benok.

Yaküm April 15 nungi November 20 tashi nung Fatehpur nung police-i Hariharganj Arogo nungi Khristan 41 puogo.

Broadwell Christian Hospital-i sensakertem nem napong, cycles aser chiyungtsü balala lema agütsüba atema police-i hospital ketdangsertem dang tasüngdangba kaogo.

Ajisüaka Broadwell Christian Hospital-i, sensakertem nem teyari agütsüba nung mapang inyakba dang lir, ta ashi.

Hospital medical superintendent, Dr. A. Jesudoss-i, hospital-i sensakertem nem teyari balala agütsüba atema Hariapur gram Pradhan-i parnok nem tepelaba certificate ka agütsüogo, aser ibaji ajanga nüburtemi parnoki inyakba mapa pelaa agizükba kuli sayur, ta ashi.

ANOGO ABEN TSÜNGREM DEN

Yisu Tsüngdang Amenba

Saka Martha sorochioktsü mapa jenti agi temulung timtemdaksü aser lai Pa dangi arua ashi, "Kibuba, künui kü kija mapa inyaktsü toktsür, aji nai meshisadanger ma? Anungji kü dang yariang ta la dang shiang". (Luke 10:40).

Marthai Yisu kanga meim aser Pa asoshi ajak inyaktsü. Yisu tenzüksü asoshi Marthai mazüngi mapa inyak aser Pa anasa alitsü aser Pa tajungba metettsü mapang magütsütet. Marthai mapa temerangba inyakli tenu dang mepelaba kümli asü. Marthai Yisu asoshi kidang mapa ajak tipdema inyaktsü merandang, tenu Maryi Yisu tsüngdang mener pa dang angaa ali. Martha mapa junga, pela tenzük saka raksa aser jashi aser tenük merema atem.

Khristai na atema inyakba tepela aser temeim sayua tenzükbaji junger. Saka kodang ne mapa agi ne mapang aser tashi ajak agir, Yisu asoshi mapang magütsülir, na kanga mazüngi akümer! Nai Marthai bilemba ama bilemtsü akok, nai meinyakra matemtsü. Aji shidak asütsü akok, saka nai mezüngbuba südaktsütsüba, Pa den tesendaktep shidak ayutsüba jir ta Yisui sayu. Iba nung jagi tanga mapa kari atsür odaktsüra ibaji Tsüngrem nungi masü. Khrista den tesendaktep ajendangba mapa inyaktsü Tsüngremi ne dang masüngdang. Tsüngrem tajungtiba metettsüba lemanng tajungtibaji tenzüka lir. Mapang kar nung Pa tsüngdang mener Pai ashiba angabaji lir, Pa tsüngdang mener ajem ajema Pai ashiba angabaji tali tongtipangba lir.

Asenok teti Pa tsüngdang mener angatsü maja, aji oda süra mapa nung tamakok alutsü. Mesüra Pa nungi tashi magi-i dang maneni inyaktsü asenok maja. Na Pa den mapang meintoki dang kanga meranga tenzüker asü ?

Khristan telok 5-i Tir Murmu dang Manipur nung rara nokdangtsü mepishi

September 10, 2023: mepishir," ta shidi nungji shia Nagaland nung aliba Khristan lir. organizations pongui shidi ka Temepishiba shidiji ajanga linük Tir, Draupadi Nagaland Angh, La Ganesan aser Manipur chief minister, N Biren Singh nem-a agütsü.

Taküm May 3 nungi tenzüka Manipur nung Kuki nunger Khristantem aser Meitei Hindu nungertem tsüngda raradang state nung Tenla ki 350 dak tema rondokogo.

Tawa Khristan organization Osangbener den jembidang pongu- Nagaland Joint Nagaland Baptist Church Christian Forum, Nagaland Council General Secretary, Theological Colleges Rev. Zelhoh Keyho-i, "Tang Association, Christian Forum Manipur nung tatalokbatem ya Dimapur, Dimapur Baptist Women Union aser Dimapur inyakba lir. Iba rara nokdangtsü Baptist Pastors Fellowship-i atema sorkari kecha meinyak," linük Tir nem temepishiba ta metetdaksü.

shidji agütsü. Manipur nung ita pezü shi "Onoki nü dang rara ajanga raradang nisung 181 süogo raksaba Tenla kitem aser aser nisung 50,000 shi Khristan rejutem tanaben jenshiogo; takoksa angurtemji yanglushiba nung yaritsü teimbaka Khristantem lir.

AO OSHI ANGAZÜKDAK:
TANÜ ANGAZÜKTSÜBA OJANG



Sakorep

(n) tsükchir ana kolak külemi agitetba (two enemies killed at a time)

* Alemlı tokolak bushiba mapang sakorep bener arurbo naroküm tulu angu.

Sakoyur

(n) arürleper (warrior, headhunter)

* Sakoyur kinji tasütait kin lir.

OLONG PAITEP # 6632

	1			2	3				
4			5						6
					7				
	8								
	9			10				11	
						12			13
14									
						15			

TIPIEN

- 2. Süjeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. ____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. ____ kibur - (5)
- 13. Tebur tembar tsüngda jatepba - (4)

OLONG PAITEP # 6632 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.



Apu-ani

Apu-ani na prong küm 60 ajungba anogo nung tena birthday amongtsü sentong tilaka yanglur tenzüksü lia kong nungiar ka kotak tenyar ka adoka, nena kechi aginer kaka shiang ta ashi nung kinungtsüi "Ni alima ajunga sema senzütsü yanglujang" ta ashi. Kotak tenyar jagi "nai aginüba nguogo" ta ashi nung kinungtsü ket nungji alima ajunga longa senzütsü ticket teperi ammer liasü. Kotak tenyar jagi kinungbu danga kechi aginer ta asüngdang. "Kü kinungtsü ya kü dang nungi küm 30 agi tanutsü kümjangma" "Phooofff"

Temeimtsü kinungbu to küm 90 tambur kümer liasü.

~ Lilir : WhatsApp

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

ALA Autumn Session
nung bill 24 benoktsü:
Pijush Hazarika

Guwahati, September 10, 2023 (Agencies): Hombar nungi Assam Legislative Assembly anogo pungunü session amentsü.

Assam Assembly Building tasenba nung tang mezüng atema session alitsü aser tanü Parliamentary Affairs Minister Pijush Hazarika-i osang aika metetdaksüogo.


Assam Legislative Assembly indang autumn session ya ki tasenba nung agitsü. Iba session nung bill 23 shi benoktsü, ta Pijush Hazarika-i ashi.

Paisa party ajak dang session tiptema agitsü aser opposition party temi amalitep alitsü mepishia metetdaksüogo.

"Assembly session nung bills 23-24 shi benoktsü. College aika melenshiogo mesüra university jenjang nung ajungketogo. Panchayati Raj bill ka benoktsü aser ano department balala indang bill tem benoktsü" ta minister Pijush Hazarika-isa metetdaksü.

"September 14 -15 tsüngda Assembly session anepdang aser nikongdang shilemtem agitsü. All party meet nung onoki jungjunga olemtepba sülen bill tem agizüksü" ta paisa ashi.

ASÜR CHITENSANGBA LKR
SÜR KÜM KA AJUNGBA ANOGO BILEMTETER



Tasüba anogo : September 11, 2022

Oba Nai onok ajak tokstür Tsüngremi nü nem agütsüba arishi tembanger tanü joko küm ka abensa arudang tanüa na onok den ano taküm lir amai kanga menungra bilemer.

Tanü onoki nü mapa aser nü sayu O tem bilemteter aser teti onok mulungjang nung alitsü..Oba Salem...

- Temeim Chirnurtem & Kinungertem

Tripura BJP MLA temi Sep 12 nü tezüngzüktep agitsü

Agartala, September 10, 2023 (Agencies): 13 buba Tripura Legislative Assembly züngsem tasentemi September 12 tezüngzüktep agitsü.

Legislative Assembly indang lobby nung anüngdang 12:00 ako nung iba sentong agitsü ta Tripura Assembly Secretariat Additional Secretary-i metetdaksü.

September 5 nü Boxanagar aser Dhanpur Assembly constituency tem nung by-election agidang BJP candidate anati takok tulu ngua liasü.

Boxanagar aser Dhanpur nung ruling BJP aser opposition CPI(M) tsüngda

dang toktep kechiyong tanga opposition party temi shilem magitsü lemtet.

BJP-i Boxanagar nungi Tafajjal Hossain aser Dhanpur nungi Bindu Debnath na toktepdaksü. Boxanagar nung CPI(M) candidate ji Mizan Hossein aser Dhanpur nung Kaushik Chanda na liasü.

Boxanagar by-election nung BJP candidate Tafajjal Hossain-i votes 34,146 aser CPI(M) candidate Mizan Hossain-i votes 3,909 angu.

Külen, Dhanpur nung BJP candidate Bindu Debnath-i votes 30,017 aser CPI(M) candidate Kaushik Chanda-i votes 11,146 angu.

Ruling MNF-i constituency 38 atema candidates shimogo



Aizawl, September 10, 2023 (Agencies): Taküm küm tatemlen Mizoram assembly elections agitsü sentong lir aser iba atema ruling Mizo National Front (MNF)-i candidate 38 shimtetogo.

Assembly constituency 40 nungi candidate 38 shimtetogo ta Deobarnü MNF lennir kati ashi.

"Honibarnü MNF nomination committee senden nung candidate 38 shimtet aser assembly constituency ana- Chalfilh aser Aizawl South-II atema meshima atar" ta pai ashi.

Chalfilh nungi tang teinyakdak MNF MLA ji Mizoram assembly Speaker Lalrinliana Sailo lir. Külen,

Aizawl south-II menden nungi Zoram People's Movement (ZPM) MLA Lalchhuanthanga lir.

MNF-i taruba election nung Lalrinliana Sailo shimtsü asü masü'ar mejangja ta osang kar ajanga ashi.

MNF nomination committee-isa Hrangturzo menden nungi nübo tasen Lalremruata Chhangte (36) toktepdaksütsü lemtetogo.

Iba constituency nungi tang teinyakdak MLA Mizoram home minister Lalchamliaana-i taruba election nung metokteptsü lemtetogo ta osang angazüker.

Chhangte ya kaketshir lennir ka liasü aser taoba

nung pai MNF youth wing nung vice president inyakogo.

Tesüiba nung ZPM-i Chakma nunger teimba ser aliba Tuichawng constituency dak alaka tanüngba assembly constituency 39 atema candidate shimba metetdaksüogo.

Congress-ia Mizoram assembly elections 2023 atema tekaratiba nung candidate shimtsü ta osang ajanga ashi.

Mizoram nung taruba assembly election ya ruling MNF, ZPM aser Congress tsüngda asemsü nung tokteptsü imlar.

Mizoram assembly kümsük December 17 nung tembangtsü anungji taküm küm tatemlen elections agitsü.

Tang Mizoram assembly nung MNF MLA 27, ZPM MLA 6, Congress MLA 5 aser BJP MLA ka lir.

Yaküm December ita Dr K Beichhua-i minister menden nungi sodi agia liasü aser iba sülen pa MNF nungi züngsem agien. Mizoram assembly elections jakdang pai BJP nung adentsü ta shiogo.

Brazil G20 senden nung Putin maputsü: Lula



New Delhi, Rongjui/Sept. 10 (Agencies): Taruba küm Rio de Janeiro nung Group of 20 (G20) senden nung Russia Tir Vladimir Putin adenyonga maputsü, ta Brazil Tir Luiz Incaio Lula da Silva-i ashi.

New Delhi nung G20 senden amendang Honibarnü Firstpost news show nung jembidang, taruba küm senden nung Putin jaoktsü, ta Lula-i ashi.

Rio nung senden mamandang Russia nung BRICS senden nung ni adentsü bilema lir ta pai ashi.

"Putin ayong-ayonga Brazil-i otetsü ta ni amanger. Aser ni ya dang shiner, ni Brazil tir asünungba aser pa Brazil-i arura, pa aputsü lenmang mali,"

ta Lula-i ashi.

Ukraine nungi tanur noklang aika ozüing alema pua bener mechi International Criminal Court (ICC) ajanga Putin aputsü March ita totuyuba agüja lir.

Sepaitemi rara mapang mapa tamajung meinyak mesüra tashiyim amshia Ukraine tanurtem pua bener mao, ta Russia-i ashir.

Putin ya aiben alima lenurtem adenshiba senden nung madener aser Delhi nung G20 senden nunga pa maden Foreign Minister Sergey Lavrov ang yoka liasü.

Brazil ya Rome Statute nung meyongnem agütsüba linük ka lir, koba ajanga ICC ya tentet. Iba dak sendakba nung Lula

indang office nungi telangzüba agüja mali.

Honibarnü G20 linüktemi moungetpa sangdong ka agütsüba nung Ukraine nung Russia-i raraba maitsü saka linük ajunga dang litsü-lika agitsü atema tashiyim mamshitsü ayongzüka liasü.

Iba telemtetba ya taoksatsüka lir, kechiaser Ukraine nung raraba mechi G20 ya sadanger lir, kong anüolen linük temi mezüingbo Leaders' Declaration nung Russia sashia aitsütsü meranga liasü, saka dangar temi rongsenketzüng nung rangloktüsü khanga liasü.

"Yimjung aser tesunep wazüka ayutsüsa linük ajak dang litsü-lika temeden aser tashi, international humanitarian law aser multilateral system tangatetba nung inyaksangshitsü ayongzüker," ta sangdong nung ashi.

"Ukraine nung teti asoshi yimjung alitsü atema mera tajung aser tapet agiba pela agizüker."

"Nuclear nok-nü amshiba mesüra amshitsü amokmerenba magizüker," ta sangdong ajanga ashi.

Ukraine o Russia nati Kyiv aser Crimea nung drones khazüka yok

Kyiv, Rongjui/Sept. 10 (Agencies): Ukraine-i linük yimtiba, Kyiv anasa Russia nung drones 20 dak tema khazüka yokba sangdonga lir, aser Russia indang defence ministry-ia Crimea peninsula anasa Ukraine nung drone ti raksatsüba sangdong.

Deobarnü linük ana tsüingta raraba nung teraksa adokba ya ano jungabo mejangja lir.

Kyiv Mayor Vitali Klitschko-i yimti nung nüngtugu Podil kiyong nung nisung ka yiru aser iba indang park ka anasa mi adok, ta ashi.

Drones raksatsüba nungi jana tem Darnytskyi, S o l o m i a n s k y i , S h e v c h e n k i v s k y i ,

Sviatoshynskyi aser Podil districts nung tsük, ta Klitschko aser yimti indang military administration ajanga ashi.

Shevchenkivskyi district nung drones khazüka yokba ajanga nisung aliba ki ka nung mi adok, koba kanga kera remsep.

Tang tashi nisung yiruba osangbo mali, ta Kyiv indang military administration tekolakba Serhyi Popok-i Telegram messaging app nung ashi.

"Drones tem linük yimtibai telok balala kumteter tesem balala nungi ait. Air defence forces ajanga tsükchir indang UAVs (unmanned aerial vehicles) dozen ana dak tema raksatsü," ta Popok-i ashi aser

tejangja Ukraine indang air force ajanga sangdongtsü ta ashi.

Kyiv anüinglen apokba ola ter shi angashi, ta osangbeneri ashi.

Iba atema Russia nungi sangdong kecha agüja mali.

Ajisüaka Russian defence ministry ajanga ashiba agi, linük indang air defence system temi Crimean Peninsula anasa Black Sea nung Ukraine-i yokba drones ti raksatsü.

Ministry ajanga Telegram sangdong nung iba ajanga teraksa mesüra ajurjba nisung yiruba indangbo mashi.

Iba atema Ukraine nungi sangdong kecha agüja mali.

Myanmar-i Russia indang Su-30 fighter jets ana agizükogo

Yangon, Rongjui/September 10 (Agencies): Myanmar-i Russia indang Su-30 fighter jets ana agizükogo, ta Myanmar indang trade minister Charlie Than-i Russian RIA state news agency dang ashiba Deobarnü sangdonga liasü.

"Tayimtsü ana agizükogo," ta Than-i Eastern Economic Forum nung shilem agiba mapang RIA dang ashi. Eastern Economic Forum ya Vladivostok nung Deobarnü tenzükogo.

Myanmar nem Su-30SME fighter jets trok agütsütsü atema linük ana tsüingda 2022

küm September ita tenangzüktepba yanglua liasü, ta RIA-i ashi.

Sukhoi Su-30SME multi-role fighter jet ya tsükchirtem indang aerial targets engagement, aerial reconnaissance, combat employment aser pilot training atema design süa yangluba lir, ta Russia indang state-controlled arms exporter Rosoboronexport-i ashi.

Kasa mapang nung Than-isa, Russia indang TASS state news agency dang ashiba agi, linük ana tsüingda tourism terenlok densema East Economic Forum mapang

tenangzüktepba aika yanglutsü ta shiogo.

Russia-i Myanmar military yimsüsürtem nem teyari agütsütsü ya United States-i aitsüogo aser parnoki military nem prangbong injang agütsüba ajanga linük nung mangatetep taliba aküimtsü ta tekümdangtsü metetdaksüogo.

Russia defence minister nungi ketdangsurtemi Myanmar semdangogo aser junta tekolakba Min Aung Hlaing-ia 2021 küm nungi Russia aiben semdanga arudar aser pa nem honorary doctorate-a ka agütsüogo.

Mulungnen O



Asür Limanungsang Jamir
P.A. to Nuklutoshi (MLA)
17.11.1988 to 05.09.2023

Onoki teti dang meima aliba asür Limanungsang Jamir (Yaongyimsen), pa shiranga aliba anogo nungi iba lima nungi pilaba mapang tashi, ozü kibong den asükho lemsatepa nübo, rongsen, shisatsü aser sarasadem ajanga kija, kibong, Arogo, lokti balala, medemertem, doctors aser nurses-temi ozü den yaritepba asoshi kanga pelaba iba osang ajanga lemsateper. Nenok ajaki nungita yariba den külemi onok azüingmeyaka meyutsüba agi ozü mulung anisüingzükdaksüogo.

Nenok temeim mapa asoshi onoki kecha meyipa magütsütettaka asen Tsüingremi nenok ajak maneni moajang ta ozü sarasadem.

Temeim Kinungtsü, Chirnurtem, Tsüraburtem, Adianutem, aser Kinungertem.

OFFICE OF THE CHUMOÜKEDIMA LONGSA SENSO TELONGJEM TENÜNGSANG AGÜTSÜR



Chumoükedima Longsa Senso Telongjem ajanga Wb.Limakumzuk aser Wt. Imtinenla na jabaso **Sb.Nungshimongba** pai NPSC CIVIL SERVICE EXAM agütsüba nung takok tulu nguteta Junior Divisional Accountant - Treasuries & Accounts Department nung ngutetba asoshi tenüngsang agütsür.

Chumoükedima Longsa Senso Telongjem ajanga tenüngsang aser tetushi tulu agütsür.

Tsüingremi nü taküm aser wadang ajak nung maneni moajangma.

Sd/-
Wb. Akangmeren Lkr
President, CLST

Sd/-
Wb. Tali Pongen
General Secretary, CLST

Morocco-i teküzmükertem yoktsü: Spain foreign minister

Madrid, Rongjui/September 10 (Agencies): Rabat-i meshia pa dangi call asüba mepeshiba sülen Spain-i agizüka liasü ta shisem.

"Morocco-i teyari kwi menoknok agi kanga mejungi kongshir aliba linük Morocco-i teküzmükertem aser tanga Mezüing onoki teküzmükertem teyari balala yoktsü, ta Spain foreign minister Jose Manuel Albares-i Deobarnü ashi.

"Iba ya Spain nungertem Morocco nung den longjema aliba temaitsü ka lir," ka pai Catalunya Radio den maneni teyari agütsütsü," ta Albares-i ashi.
(Maneni tapak 8 nung...)

Kiran George-i Indonesia Masters kokogo



Rongjui/September 10, 2023 (Agencies): India nungner lanur asayar Kiran George-i Deobarnü Indonesia Masters trophy koka BWF World Tour super 100 title tanabuba kokogo. Final asaya nung pai Japan nungner asayar Koo Takahashi straight-game nung koka liasü.

Arishi küm23 tain Kochi nungi asayar yagi taoba küm Odisha Open koka liasü aser taküm pai iba asayamung final nung world No. 82 asayar Takahashi 21-19, 22-20 agi koka liasü.

Iba asayamung tepeyong Kiran-i kanga junga asayaogo aser semifinal nung pai Indonesia nungner asayar Tommy Sugiarto set asem

asayaba sülen koka liasü, shiba BWF World Tour nung asayar tajung ka lir.

"Asaya kanga junga koktetogo. Maongka agitetba aser aibelen mesüi asayaba ajanga asaya koktetogo. Tanga asayartema lanur dang aser kasa dang kanga junga asaya anungji pai iba asayamung akokba atema kanga pelar," ta Prakash Padukone Badminton Academy (PPBA) director aser taoba chief national coach Vimal Kumar-i ashi.

"Tang anisüngzüka kazütsüba masü saka maneni meranga renemshitsüba mapang ka lir kechiyong pa Hong Kong-i oa asayatsü lir. Pa akoksatsü kecha mali anungji pai asayar karbosa akoktsü

merangtsüla," ta pai ashi.

Kiran George, shiba Bangalore nung PPBA nung training agir pa mezüngbo 1-4 agi tesülen liasü saka tanem tanemi Takahashi menepa atua 8-8 aküm aser break tashi nung pa point ana agi timba liasü. Iba sülen pa 18-15 agi tejakdang aküm saka Takahashi-i maneni kanga meranga asaya 19-20 aküm saka India nungner asayar yagi süngjemshir asaya-a iba asaya akok.

Tanabuba game nung asayar ana maneni kanga toktepa asaya aser 6-6 ta point kasa liasü saka mapang tatsüka dang lir Kiran 16-11 agi tejakdang aküm. Ajisüaka Takahashi-i maneni kanga meranga asaya point 19-19 aküm saka Kiran mosoteti asaya kokdaktüsü.

Iba asayamung nung Kiran-i asayar tejen Tommy Sugiarto 23-21, 16-21, 21-8 agi akok. Paisa Thailand nungner asayar Panitchaphon Teeratsakul, Japan nungner asayar Takuma Obayashi, Singapore nungner asayar Jia Wei Joel Koh aser Chinese Taipei nungner asayar Huang Yu Kai nungner koka liasü.

Kiran-i, taoba küm Odisha Open den Polish Open-a kokogo aser Denmark Masters nung tanabuba jenjang nung tembanga liasü.

Coco Gauff-i US Open tetsür kija asaya kokogo



Rongjui/September 10, 2023 (Agencies): America tsür Coco Gauff-i Honibarnü US Open tetsür kija asaya final nung tesülen nungi atur Belarus tsür Aryna Sabalenka koka tang mezüngbuba Grand Slam ka koktetogo.

Arishi küm 19 tain Gauff-i final nung kanga junga asayateta 2-6, 6-3, 6-2 agi Sabalenka madak takok ngua liasü. Tena tsüngda ghonda ana ser minute 6 asaya liasü.

Florida nungi sixth seed asayar ya final nung second seed asayar Sabalenka kübokang liasü, shiba taruba hopta rankings nung world number one akümtsü.

Asaya nung asayar anapronglai aibelen aika mena saka tongtibang mapangtem

nung Gauff-i tajungba asayateta asaya kokogo.

July ita Wimbledon nung mezüngbuba round nung tsükatokba sülen iba asaya akokba ajanga Gauff nem la asaya dak tali temulung lemteta kümdaktüsü.

July ita tamakok anguba sülen lai Washington aser Cincinnati nung asayamung kokogo aser tang iba asayamung koktetogo koba la indang career nung takok tulutiba asütsü.

Tracy Austin aser Serena Williams na sülen Gauff ya America tsür teenager tem rongnugi US Open akokba asayar tasembuba kümogo

Mezüngbuba game nung Sabalenka-i Gauff indang mezüngbuba service game

break asü aser 2-0 agi tejakdang aküm ajisüaka Gauff-ia meyiper Sabalenka indang serve break süa 2-2 aküm.

Ajisüaka Sabalenka maneni Gauff indang serve break süa 3-2 agi tejakdang aküm aser maneni taruba asaya koka 4-2 aküm.

Gauff-i mezüngbuba game nung serve junga mesüteni liasü aser iba maongka agi Sabalenka-i maneni la indang serve break süa 5-2 aküm aser taruba asaya koka mezüngbuba game akok.

Tanabuba set nung Gauff-i aibelen ishiba mena aser la indang service-a metongshia liasü.

Asaya nung Sabalenka-i double-fault ka menaba sülen Gauff nem la indang serve break südakja 3-1 agi Gauff tejakdang aküm.

Taruba game nung Gauff-i break point ka kümzükteta la 4-1 agi tejakdang aküm aser tesülen meyipa merprangi asaya kokatok.

Tatembangbuba set nunga Gauff-i maneni kanga junga asaya la 2-0 agi tejakdang ser tenzük aser Sabalenka nem game ana dang kokdakja lai tasembuba set 6-2 agi ayong ayonga koka liasü.

Nagaland Wushu Association inti senden Sept 27 nü agitsü

Kohima, Rongjui/September 10 (Agencies): Nagaland Olympic Association tawabangba kübok Nagaland Wushu Association inti senden September 27 nü 10 ako nungi tenzüka New Minister Hill Kohima nung tir Kudecho Khamo'er kidang agitsü.

Senden nung State nung Wushu asaya tekübokba jenjang nung ajungkettsü asoshi sensak asemtsü aser iba den Nagaland kübok district ajak nungi NWA nung züngoksema aliba association tem den state level asayamung ka asoshi sensak asemtsü, ta Wushu Association sangdong ka ajanga metetdaktüsü.

Iba dak sendakba nung District Wushu Associations tir aser General Secretary tem

dang senden nung tamakok maludaktüsü arua shilem agitsü asoshi mepeshia metetdaktüsügo.

Kasa mapang nung state level coaching aser judges seminar ka September 28 aser 29 nü NIS Wushu coach Gabriel Khamo-i achaayanga agitsü.

Association-isa NWA nung züngoksema aliba district tem dang coaching camp nung shilem agitsü asoshi züngsem ananabosa yoktsü atema metetdaktüsügo.

Ken o dak sendakba nung osang tejangjaba agitsü atema joint secretary Shomwang Wangnao (+919863238620) mesüra Press secretary Azhove Resu (+919916580774) na den tongteprateptsü asoshi metetdaktüsügo.

Mustafa Hajrulahovic asayamung nung India-i medal 10 angu

Rongjui/September 10, 2023 (Agencies): Deobarnü 21buba Mustafa Hajrulahovic Memorial Tournament nung Manju Rani-i final asaya nung Afghanistan tsür Sadiya Bromand 3-0 agi koka India team-i iba asayamung nung medal 10 nguogo.

Iba asayamung ya Bosnia and Herzegovina kübok Sarajevo tesem nung asaya, kong India nungner asayartemi gold medal teku aser silver medal ka ngua liasü.

Ring nung tasa tajung beshia kanga junga asayaba sülen India tsürla nem ya 'Best Woman Boxer' naroküm agüja liasü.

Tebur 51kg category asaya nung Barun Singh Shagolshem-i Poland nungner asayar Jakob Slominsk 3-0 agi akok; tebur 57kg category final asaya nung

Akash Kumar-i kanga tasü ita asaya ajisüaka 1-2 agi Sweden nungner asayar Hadi Hadrous mekoki liasü.

Tebur 63kg category asaya nung Manish Kaushik-i asaya amokbanger asaya aser pai Palestine nungner asayar Mohammed Soud 3-0 agi koka liasü.

Maneni tebur 92kg category asaya nunga Naveen Kumar-i takok tajung ngutetogo. Poland nungner asayar Mateusz Bereznicki aser Kumar na kanga toktepa asayaba sülen Kuma-i asaya 2-1 agi koka liasü.

Jyoti, Shashi, Jigyasa, Vinakshi aser Satish Kumar nungneria pei tata asaya nung takok ngutetogo. Parnok den asayatsüpurtem final nung masayatetsüsa akümba sülen parnok nem takok agüja liasü.

Morocco-i tekümzükertem... (Tapak 7 nungi...)

Iba dak alaka Albares-i osang tejangja magütsü ajisüaka interior ministry otongdar kati ashiba agi, Spain indang Military Emergencies Unit (UME) züngsem 65 tekümzükbba maparen balala nung shilem agitsü atema Morocco-i yoktsü.

UME ya armed forces lokti tentet ka lir, koba morok mi lendong, tzümetsüng aser menoknok amala lendong mapang takaratiba nung jenjang agitsü atema tentettsüba lir.

Taküm February ita Turkey nung menoknok tesashi ka anokba sülen UME unit ka yokogo aser parnoki tetsü ka aser tanur ana densema nisung trok tashi kümzüka liasü, ta Spain indang defence ministry-i ashi.

Hokolbarnü Morocco nung küm 60 tsüngda menoknok tesashitiba anokogo aser iba lendong nung nisung 2000 dak tema süogo. Kasa mapang nung

tekümzükertemi yimtsüng aika ajareper aliba nungi taküm alirtem aritepa bushiba mapang ka lir.

Iba lendong nung ano nisung 2,059 yiruogo aser yirur alirtem ya timba kanga mejungu yirur lir.

Hokolbarnü 6.8 magnitude tesashi menoknok kati Marrakesh anokshitsü aser kinük nung aliba yimtsüngtem aika kanga mejungu raksatsüogo. Emergency service züngsemtem tenem nung aliba yimtsüngtemi aritepaogo, kong nisungtem aika sabanga alitsü ta tsübua bilemer.

Menoknok indang epicentre Al-Haouz province nung nisung 1,293 asü aser Taroudant province nung nisung 452 süogo.

Kidanger Algeria shirnok Morocco den tesendaktep mejungu lir parnoki yirur alirtem anir aotsü aser teyari agütsüba maparen balala inyaktüsü atema airspace lapoktsüogo, koba küm ana shi shibanger liasü.

BILEMDANGANG

"Pei bilemba dang shitak ta bilemra renloka maotsü."